

Governu deside harii planta LNG iha Natarbora no sei okupa rai ektare 3.000



MPRM, Francisco Monteiro, esplika hela ba Reprezentasaun Governu Australia ba Greater Sunrise kona-ba preparasaun TL nian ba harii planta LNG iha tasi ibun Natarbora-Manatuto. Imajen/Hortencio Sanches.

MANATUTO, 16 julu 2024 (TATOLI)– Ministru Petroleu Rekursu Minerais (MPRM), Francisco Monteiro, hateten, governu deside ona harii planta fábrica Gás Naturál Likéfetu (LNG, sigla inglés), iha Natarbora no sei okupa rai hamutuk ektare 3.000.

“Totál rai ne’ebé atu kobre planta projetu LNG ne’e hamutuk ektare 3.000, kobre mós ba refinária, petrokímika no seluk tan iha Natarbora,” Ministru Francisco hateten ba jornalista sira iha Natarbora, tersa ne’e.

Fatin tolu hanesan, Ministru ne’e dehan hanesan Suai, Betano no Natarbora hola parte ba projetu Kosta Súl no Governu kontinua iha komitmentu atu dudu prosesu hotu bele sai hanesan pontu ba empreza ne’ebé hakarak investe iha Greater Sunrise no esplorasun sira seluk kona-ba mina no gas iha tasi laran no rai-maran.

“Konseitu ita atu dezenvolve indústriia ida naran *downstream* nian ne’ebé inklui refinaria, petrokímika no planta LNG konseitu ida atu ita bele halo transformasaun ita nia rekursu ne’e hodi kapta di’ak liutan valór rikusoin sira, kria mós kampu traballu, oportuniade negósiu oioin hodi ajuda dezenvolvimentu ekonomia rai-laran,” Ministru ne’e hateten.

Governante ne’e dehan rai ne’ebé atu kobre ba planta LNG balun rai estadu no balun rai eransa comunidade Natarbora nian.

Nune'e, iha tempu besik Governu sei ko'alia ho rai-na'in sira. Maibé seidak to'o iha faze sosializasaun ho comunidade sira kona-ba atu muda sai sira ne'e oinsá, maibé Governu iha responsabilidade atu kria kondisaun ba familia afetadu sira ho kompensasaun.

“Ami hatene ona katak rai barak comunidade nian, balun mós estadu nian, ita sei to'o iha faze diskusaun, maibé husi inisiu comunidade barak mak aseitu atu ofrese sira nia rai ba dezvoltimentu ida ne'e no Governu kria kondisaun ba sira,” Governante ne'e tenik.

Iha fatin hanesan, Reprezentante Espesiál Governu Austrália ba Diskusaun Dezvoltimentu Greater Sunrises, Hon Steve apresia ba Governu Timor-Leste ne'ebé hola iniciativa di'ak hodi prepara Kosta Súl ba dezvoltolve Greater Sunrises no rekursu minerál iha rai maran no tasi laran.

“Ha'u apresia tebes ho iniciativa Governu Timor-Leste nian ne'ebé mak iha iniciativa no seriu tebes hodi prepara kondisaun no aselera infraestrutura hodi prepara ba dezvoltimentu Greater Sunrise no seluk tan,” Steve tenik.

Tuir Steve, durante loron rua halo vizita iha Kosta Súl haree rasik ho matan kona-ba kondisaun hotu ne'ebé Governu prepara ona, hanesan aeroportu, auto-estrada, rai ba planta LNG no seluk tan.

Rekorda fali katak, Timor GAP investe ona millaun \$20 iha Beço, Viqueque hodi halo estudu ba planta LNG iha tasi-laran no rai maran.

Governu liuhusi ekipa interministeriál lansa ona programa sosializasaun ba indentifikasaun rai iha área planta LNG no iha tempu hanesan Timor GAP apresenta benefísiu husi projetu LNG no rai ne'ebé sei afeta husi projetu ne'e.

Ekipa interministeriál hamutuk ho Timor GAP inklui autoridade lokál mós indentifika no análize kompensasaun ba populasasaun ne'ebé afetadu hosi projetu LNG, bazeia ba lejizlasaun ne'ebé vigora.

Entretantu, populasasaun Beço, Maluro mós apoia konstrusaun fábrica LNG hodi retira ona sira nia proposta kompensasaun ho kustu millaun \$500.

Abitante afetada iha suku rua hanesan Maluro no uma Wa'in Leten kompostu hosi Aldeia Loho-oan, Makaloso, Maluro, Makaliku no Kaidiu-Bere ho total uma-kain 447.

Planta LNG ne'e sei presiza rai ektare 650 no comunidade mós hatudu ona rai ektare 400 atu konstrui bairru foun.

Atu fasilita projetu marina, Timor GAP iha ona akordu komersiál ho Kompañia Xineza ho naran *China Civil Engineering Construction Corporation* (CCECC) ho orsamentu millaun \$943.

Governu sei deside Betano sai sidade petróleu iha Timor-Leste



Ministru Petróleu no Rekursu Minerál (MPRM), Francisco Monteiro, hatudu no esplika hela mapamentu sidade Petróleu Betano, ba Representante Espesiál Governu Austrália ba Diskusaun Dezenvolvimentu Greater Sunrise, Steve Bracks. Imajen/ Hortencio Sanchez

MANUFAHI, 16 julu 2024 (TATOLI)- IX Governu Konstitusionál ne'ebé lidera husi Primeiru-Ministru, Kay Rala Xanana Gusmão, sei deside suku Betano, Postu Administrativu Same, Munisípiu Manufahi, sai sidade petróleu iha Timor-Leste.

Planu Governu Timor-Leste ne'e, hato'o husi Ministru Petróleu no Rekursu Minerál (MPRM), Francisco Monteiro, bainhira hetan akompaña ho Representante Espesiál Governu Austrália ba Diskusaun Dezenvolvimentu Greater Sunrise, Steve Bracks, hala'o diskusaun ho comunidade no apresenta planta sidade petróleu iha Betano-Manufahi.



Mapa Sidade Petróleu Betano. Imajen/Hortencio Sanchez

“Ha’u rasik ko’alia ona ho Primeiru-Ministru no sei deside Betano sai hanesan sidade Petróleu, maibé buat hotu sei iha prosesu ka tuir etapa ba etapa, planu hirak ne’e balun ita nia oan no bei-oan sira mak sei kontinua. Maibé ita tenke tau ona iha planu,” hateten Ministru Petróleu no Rekursu Minerál (MPRM), Francisco Monteiro, iha Betano, tersa ne’e.

Razaun deside sai sidade petróleu, nia dehan tanba Betano tama mós planu espesífiku no área estratéjiku ida ba dezvoltimentu kampu Greater Sunrise nian, bainhira dada mai Timor-Leste.

Tanba ne’e mak ekipa MPRM hamutuk ho Reprerzentante Espesiál Governu Australia ba Greater Sunrises Hon Steve vizita hodi haree direitamente.

“Betano ne’e iha ita mós planu espesífiku ida ba dezvoltimentu Greater Sunrise, ne’e mak ekipa Ministériu Petróleu no Rekursu Minerál (MPRM) mai ho Steve Bracks (Reprerzentante Espesiál Governu Austrália ba Diskusaun Dezvoltimentu Greater Sunrise) mai haree no ha’u rasik esplika ba nia ita presiza prespetiva ida kona-ba dezvoltimentu Kosta Súl”, katak governante ne’e.

Aleinde ne’e, Governante ne’e mós afirma projetu auto-estrada ne’ebé ligasaun Suai bá Natarbora sei liuhusi Betano, nune’e husu ba comunidade sira atu koopera, nune’e Governu bele kontinua auto-estrada ne’e ba to’o Natarbora.

“La kle’ur tan ita sei liga auto-estrada ba Natarbora kona husi Betano ne’e, ida ne’e parte ida husi ita nia preparasaun ba oinsá dada kadoras Greater Sunrise mai Timor-Leste. Auto-estrada ne’e mós bele fasilita imi Betano oan sira atu halo movimentu ba mai kuaze minutu 30 husi Betano ba Natarbora, Maibé di’ak imi mesak tetún terik nia oan sira ne’ebé imi sei koopera ho Governu,” nia afirma. Francisco konklui.

Austrália apresia projetu iha kosta súl

Entretantu, Reprerzentante Governu Austrália nian ba diskusaun Projetu Greater Sunrise Hon Steve Bracks, hateten, nia parte hetan konvite espesiál husi Primeiru-Ministru Kay Rala Xanana Gusmão hodi halo observasaun ba dezvoltimentu kosta súl ne’ebé la’o daudaun.

“Ha’u simu konvite husi Primeiru-Ministru, Kay Rala Xanana Gusmão, atu mai vizita Suai hodi observa dezvoltimentu sira iha kosta súl, Ha’u haree projetu sira la’o daudaun, iha ona Aeroportu no projetu seluk, ha’u mai haree ho matan rasik preparasaun ba LNG nian, ne’ebé sei halo iha Natarbora,” Steve katak ba jornalista sira iha Suai, segunda ne’e.

Projetu hirak ne’ebé Governu hala’o ona liu husi Timor Gap impresivu tebes no fiar katak ba oin projetu sira sei la’o ho di’ak.

“Atu ko’alia kona-bá Dezvoltimentu Greater Sunrise nian mak ha’u mai iha ne’e atu haree ho matan rasik kona-bá Timor-Leste nia preparasaun. Maibé atu dezvoltolve sei iha diskusaun nafatin husi Timor-Leste no Austrália,” nia dehan.

Kona-bá negosiasaun Greater Sunrise sei iha prosesu nia laran, atu dada mai Timor-Leste ou Austrália seidauk hatene loos, maibé fiar katak Austrália ho Timor-Leste sei buka solusaun.

Molok ne’e, Primeiru-Ministru (PM), Kay Rala Xanana Gusmão, hateten, IX Governu halo esforsu atu lori kadoras mai Timor-Leste, nune’e bele fó solusaun ekonómikamente viável no seguru.

Nune’e, Dezvoltimentu Kosta Súl sei sai sentru atividade iha setór petróleu no gás naturál, ho estabelesimentu baze lojística iha Suai. Hanesan mós refinaria petrolífera ida nomós kompletu petro-kímiku iha Kosta Súl inklui instalasaun fábrica ba gás naturál likifeitu no gás ne’ebé sei mai hosi Greater Sunrise liuhusi konstrusaun gazodutu hosi tasi okos to’o rai-maran,

Projetu tasi mane sei mosu dezvoltimentu iha Kosta Súl tomak, ho konstrusaun sidade foun no apoia infraestrutura.

La’ós de’it esplorasau, maibé iha ona faze konstrusaun no faze operasaun infraestrutura, nune’e servisu ne’ebé sei mosu tan mak sei kria postu traballu direta no indireta liu 50.000.

Governu konsidera katak país tomak sei hetan benefísiu hosi projetu ida-ne’e, la’ós de’it aumentu Produitu Internu Brutu (PIB), maibé kona-ba dinámika ekonómika ne’ebé fó ba produtividade hosi fatór ekonómika oin-oin, inklui mós subkontrasaun servisu hanesan restaurante, enjeñaria, seguransa, fornimentu kombustível, servisu jestaun profisionál no tékniku, inklui nesiedade iha produitu agríkola.